

քել զվկայական Գաբրիէլի, զի զեկեղեցին զոր հիմնարկեալ կառոյց՝ ինքն օծցէ ձեռամբ իւրով, զի հովիւ քաջ է եւ արթուն վասն ժողովրդոց եգիպտոսի, և արժանի այնմ պատուոյ, թէ եւ գտանիցի 'ի նմա մասնաւոր ինչ թերութիւն, այլ մեզ յամենայնի ընդունելի և արժանի է եւ քաջ արժանի, և զի հռչակեցաւ 'ի վիճակիս թէ Գաբրիէլ ունի ամբառնալ յաստիճան Եպիսկոպոսութեան, և այլ սոցին նման բանք երկար, տես 'ի նամականիս 1838—39, 1 Յունիսար. և 'ի 6 Հոկտեմբեր:

Ի վերայ այսր նամակաց զիջաւ Պօղոս Եպիսկոպոս 'ի թախանձանս նոցա, մանաւանդ ակնածէր 'ի Պօղոս Պէյէ. գրեաց առ նոսա պատասխանի նամակաց և ընդ նմին առաքեաց զվկայական Գաբրիէլի, և նա ել 'ի ճանապարհ և գնաց 'ի Սիւս և ձեռնադրեցաւ յաստիճան Եպիսկոպոսութեան 'ի Տ. Միքայէլ Կաթուղիկոսէ 'ի ցեղէ Աջապահից, ('ի 15 Յունիսի, 1839) եւ դարձաւ 'ի վիճակն իւր յեգիպտոս, և վարեաց զիշխանութիւն իւր մինչ ցիսխճան կենաց իւրոց անկախ յԱթոռոյն Երուսաղէմի, կոչեւ լով զինքն Փաթրիք. էառ նաեւ հրովարտակ յՕսմանեան Դրանէ միջնորդութեամբ Յակոբոս Պատրիարքի Կոստանդինուպօլսոյ, սակա անկասկած վարելոյ զիշխանութիւն իւր: Եւ այսպիսի եղանակաւ որոշեցաւ Գաբրիէլ յիրաւասութենէ Աթոռոյն Երուսաղէմի եւ վախճանեալ թաղեցաւ 'ի մէջ եկեղեցւոյն, ուր յառաջագոյն պատրաստեալ էր զգերեզման իւր: Եւ զինի մահուան նորա ծագեցան վէճք մեծամեծք 'ի վերայ թէմական և կալուածական խնդրոց, զորս թողումք արձանագրել յայլում տեղւոյ և ժամանակի:

Ճեմարանն որ կառուցաւ յիւսկիւտար ծախիւք Ս. Աթոռոյն, որպէս գրեցաք կանխագոյն, կամեցան իշխանաւորք ազգին, զի Աթոռն նպաստեցէ նաեւ օրական ծախուց նորին, ուստի խորհրդով սահմանեցին զի Փոխանորդն Երուսաղէմի անխափան վճարեսցէ յիւրաքանչիւր ամիս 10,000. եւ 'ի տարին 60,000 դահեկան՝ և վասն այսր ժողովք Ամիրայից գրեցին առ միաբանութիւնս Աթոռոյն, և 'ի մասնաւորի ճարտարապետ Յովճաննէս Ամիրայ առ Պօղոս Եպիսկոպոս, տալ յարգել միաբանութեան զխորհուրդ Ամիրայից, եւ շահել զմիտս նոցա զի մի ընդդիմացին,